



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma : f Tir Yimyim

Instagram tiryimyim@aolima

YouTube tir yimyim TAPAK 8

India Test specialists tem atema camp ayonger; Mitchell-i Conway melenogo

Taoba Libya yimsüsür Gaddafi'er jabaso tir atema tokteptsü



VOL. XIX ONO. 38 (ADOK 38) DIMAPUR TENTONÜ (MONDAY) YIMPOKSÜI (NOVEMBER) 15, 2021

₹ 5.00

Asür Rifleman Khatnei Konyak mang Tizit tongogo



Deobarnü asür Khatnei Konyak indang mang Mon district nung pa talidak tonga bener arudang agiba noksa angur.

Dimapur, November 14, 2021 (TYO): 46 Assam Rifles nung Rifleman Khatnei Konyak indang mang tanü nikongdang 3:30 ako meta Mon district kübok Tizit tonga aru.

Honibarnü Manipur kübok Churachandpur district nung telungpurtemi amakdang Khatnei Konyak khaset.

Deobarnü Imphal nung Rifleman Khatnei Konyak nem tetushi agüja 'wreath-laying ceremony' agia liasü.

Telungpurtemi 46 Assam Rifles nung Commanding Officer (CO) Colonel Viplav Tripathy indang convoy amak.

Iba lendong nung Colonel Viplav den pa kinungtsü aser jabaso na den sepai pezü- Suman Swargiary, Khatnei Konyak, RP Meena aser Shyamal Das nung asü.

Prof. Jagdish Mukhi-i asükhü lemsar:

November 13, 2021 nü Manipur kübok Sialsi yim nung telungpurtemi 46 Assam Rifles indang convoy amakdang Rfn

Khatnei Konyak aser nisung 6 tepsetba osang angashia aoksar aser temolung raksar, ta Assam aser Nagaland Governor, Prof. Jagdish Mukhi-i metetdaksü.

Assam Rifles sepaitem den tetsür aser tanur tepsetba khukhua aitsür. Linük nung yimjung meimba senso shia linük tajungba kümdaktsüsü merandang aser talisa North East India nung tensa süngjemdaktsüsü inyakdang iba ama mapa inyakertem magizüker aser parnok merenshitsu ta pai ashi.

"Rfn Khatnei Konyak-i linük tenzük aser asen linük atema taküm bendanga agütsüogo. Pa ama tasütait aser tetsübu maliba sepai ka alibaji asen linük asoshi konang lir. Pa asüba ajanga India-i tasütait jabaso aser sepai ka akoksaogo" ta Prof. Jagdish Mukhi-isa ashi.

Nagaland nung alir ajak tenung nung ni asükhü lemsateper aser Tulusang Tsüngremi Rfn Khatnei Konyak'er kinunger sünepjang ta sarasademtsür, ta paisa ashi.

Helping Hands NGO-i National CSR Award 2021 agizüktsü

Guwahati, November 14, 2021 (Agencies): Special Commissioner of Delhi Police, Robin Hibu-i tenzükba NGO Helping Hands-i National CSR Award 2021 agizüktsü.

Iba sempet ya India International Centre, Delhi nung 9 buba National CSR Conference amongdang agütsüsü.

Helping Hands nung züngsem aser volunter temi mapa tajung inyakbatem linük nung nübertemi ajitetogo aser taoba mapang nunga parnok teloki sempet aika nguteta lir.

"Iba sempet tulu ajanga onok tali akasodaktsür. Onoki maneni tasümantem aremstü, rongdoktsü, kidangi mangtem bener yoktsü, azü tenlatsü, CSR scholarship ajanga lanurtem yaritsü aser nungdabaputem

yaritsü" ta Robin Hibu-i metetdaksü.

"Helping Hands nung star performers- Akash Sharma, Gemjum Gadi, MA Khan, Gaurav Vats, Gaurav Thakur, Amandeep Singh, Dr Lira Sangtam, Jyoti Jungluju, Rajesh Narang, Munesh Solanki, asür Deoraj Gurung, Habung Lampung, Lama Yogchen, Sanjay Goswami, Rajen Chetri aser Dr Sangeeta Chanu nung dang kanga pelaba shisemer" ta paisa ashi.

Annual CSR Conference ayongzükertem NGO yariba aser India nung nungdabaputem, sensakertem aser timtem ajururtem asoshi mapa tajung inyaktsüba atema pelaba metetdaksü, ta Robin Hibu-isa ashi.

Nagaland sorkari SARFAESI ACT 2002 mapa akümstsüla: BAN

Dimapur, November 14, 2021 (TYO): Business Association of Nagas (BAN)-i Nagaland sorkar dang SARFAESI ACT 2002 mapa küma inyaktsü atema tayongzükba agütsüsügo.

1960s mapang Singapore nung tanü asen lima nung tensa mesüka liasü. Iba mapang Singapore nung sensaktia liasü saka tanübo parnok alima nung rongsenketzung tashi ka kümogo. 1965 tashi Singapore nung sensakba khuret tulu liasü saka aser iba ajanga Malaysia-i Singapore den pilatsüsa aküm. Ajsüaaka, Singapore nung Government policy tajung yangluba, shishilembatsü lenmang tesadem lapoktsüba, kin balala temeyoktep nung tensa süngjema ayuba aser ozüing tesashi yangluba ajanga tanü parnok takar linük kümogo, ta BAN-i sangdong ka nung ashi.

Asenoki alima melenshiba sülen anidakra Naga nung tarutsü nung rongsenketzung jenjang tajungba akümstsü. Naga nung rongsenketzung tsütsü nüjiso angutsü atema asenoki alemli nungi inyaksangshia aruba mapatem melenshitsu. Sorkari state atema policy shitak yanglutsüla, ta BAN tir L Mongkum Jamir aser Tongti Tezülur Dr Yan Murry nati sangdong nung ashi.

Nagaland nung sorkar aser nija mapa mali kümogo aser lisopurtemi shishilemba mesütetba ajanga nija sector nung mapa balaka madoker. Iba ajanga sempet aketba Naga lanur aika amajok nung mapang endoker aser kar India len oa mapa inyaker. Naga lanur nem maongka shitak agütsüra, parnokki rongsenketzung dak sendakba mapa inyaktsü aser rongsen bendena Naga nung tsüngda lemsateptsü.

COVID-19 Nagaland: 19 dak putet & 14 taneptsü angu

Kohima, November 14, 2021 (TYO): Nagaland nung Deobarnü nisung 19 dak COVID-19 putet aser nisung 9 taneptsü angu.

"Tanü putetertemji Mokokchung nung nisung 15 aser Dimapur o Tuensang nung anana (2) lir" ta , said State Nodal Officer for Integrated Disease Surveillance Project, Dr Nyanthung Kikon

"Taoba ghonda 24 tsüngda COVID-19 puteta alir nisung 15 taneptsü angu. Parnokki Dimapur nung 5, Kohima o

Shishilembaba mapa inyaknür saka teka nung sen mali ta asürtemi bank nungi sen apua mapa tenzük oteter saka Nagaland nung inyakym shitak lateta maliba ajanga bank temi Naga nung nem sen aputsütsü nungnanger. Külen, ano asenokia bank inyakym junga memetetba aser mangatetba ajanga bank dang sen apuba melena ali-kimung aser kiojen indang patta/kulikakettem agütsübaji sen meypa magütsüra, bank-i agiadoktsü ta arentaka bilemer aser tsübur, ta BAN-i ashi.

Ajsüaaka, bank nung sen apuba atema ali-kimung aser kiojen indang patta/kulikakettem (mortgage property) agüja ayubaji sen meypa agütsütsü aser tashishitsu kecha malitsu atema inyakba mapa ka lir. Iba tetezü ya asenoki sen apuba meypa magütsüra bank temi asen kimung mesüra kiojen agiadoktsü ta masü. Külen, bank-i aiben ali-kimung amala magizüker aser tanga rongsen ang meshir saka itemji maliba ajanga nisungtemi sen maputeter, ta parnokisa ashi.

Nagaland nung SARFAESI ACT 2002 benoka mapa küma inyakba ajanga bank temi ali-kimung agizüktsü aser Naga nungeri sen apuba magütsütetba ajanga bank temi ali-kimung ajak tangar dang yokdoktsü ta asüba tangatetbaji tai lir.

Bank temi tamasa rongsenketzung jenjang aser mapatong junga asadanga sülen ang sen aputsür. Bank-i cadastral surveyed area nung agütsüba Land Patta/Jamapandi meshir. Sen apubaji meypa magütsütetsüsa- Non Performing Assets (NPA) kümra, bank temi sen apur nem one time settlement (OTS), sen agütsüba mapang yanglushir aser tatem nung ang 'mortgage property' nung

Tuensang nung pezüzü (4) aser Mokokchung nung 2 lir" ta pai ashi.

Nisung 31,997 rongnungi 30,088 taneptsü angu aser ibaji 94.03% lir, ta Dr Kikon-i ashi.

"Tang nisung 167 anepaludar saka parnok 136 dakbo shirangba yimya kecha mali" ta paisa shisem.

"Honibar tashi nung nisung 717,217 nem COVID-19 vaccine indang dose 12,35,022 agütsüogo" ta State Immunization Officer, Dr Ritu Thurr-i ashi.

teka ayir, ta parnokisa metetdaksü.

Naga nung entrepreneur kari Bank dang nungi sen tetemlok teimba nung tangar den sen apuba magütsütetba agi sen aputsürtemi tanga teyari lenmang kecha mesayui dang 'mortgage property' agiba atalokogo. Iba ya asen loktiliba nung taochi melii inyaker aser iba atema asenoki kecha inyaka mali, ta BAN-i ashi.

SARFAESI mali yonga Nagaland nung bank temi alikiojen sota yur sen aputsür. Bank temi iba inyakym nung loan meyrjang aika agütsüogo saka iba mortgage property agütsü atema ken o benokba kanga ajema lir. SARFAESI ACT 2002 kübok sen apuba Non Performing Assets (NPA) akümba sülen anogo 60 lir Bank temi sen apur nem sangdong ka agütsütsü. Senji meypa magütsüra bank-i tenung atema mortgage property sota ayur saka kiburbo makümer. Bank temi kimung-kiojen yokdoktsüsa kümra, talir shitak dang yokdoktsü atema state nung ozüingtem lateta aliba ama inyaker. Anungji SARFAESI ACT 2002 agizüka mapa tenzük nungbo bendangertem asen ali alizükdoktsü ta asüba tangatetba malitsu, ta parnokisa metetdaksü.

Sorkari shishilembatsü aser rongsenketzung dak sendakba policy tajungtem meyanlura aser entrepreneur temi Bank o sen dak sendakba rejutem nungi sen aputetsüsa inyakym melira Nagaland nung rongsenketzung tsütsü tejakleni maotsü, ta

Anungji state sorkari tekaratiba nung SARFAESI ACT 2002 mapa küma tenzüktsü aser state tejakeni anir aotsü ayongzükter, ta BAN-isa ayongzükogo.

"Vaccine agirtemji frontline workers 60,965, healthcare workers 15,999, arishi küm 45 ser tempur 203,601 aser arishi küm 18 nungi 44 tsüngda alir 436,652 lir" ta paisa ashi.

"Vaccine agirtem rongnungi nisung 517,805-i dose anaprong agiogo. Parnokki frontline workers 48,166, healthcare workers 13,460, arishi küm 45 ser tempur 166,380 aser arishi küm 18 nungi 44 tsüngda alir 289,799 lir" ta Dr Thurr-isa metetdaksü.

Dimapur nung Red Cross puri timtemer nem teyari agütsü



Dimapur nung Red Cross puri timtemer nem teyari agütsübo noksa nung angur.

Dimapur, Yimpoksüi/Nov. 14 (TYO): Indian Red Cross Society, Nagaland State ajanga Chairman, Abeni Lotha aser General Secretary Dr. Neiphu Kire na lenisüba nung Sanitary Pads, Bath Soaps, Washing Paste, Coconut Oil, Razors tem aliba Hygiene Kits 150 shi Public Ground colony, Dimapur nung kitsük-kirong lendong ajurur alir nem agüja liasü.

Public Ground Colony, Dimapur nung Brehostibar aonung electrical short-circuit nungi kitsük-kirong lendong ataloka kibong 132 nung kongshia liasü.

Iba sentong nung Vice-Chairman Ajay Sethi, Honorary Secretary K. K. Paul, Patron Sanjay Jain, Life Member Apu

Roy, Volunteers Asaduddin Ali & Rishav Sethi nungertem den ano Muslim Council Dimapur indang tir, Hannan Tapadar, Public Ground Colony Chairman Teisovinuo Lotha & Secretary Mhabemo Kikon nungertemi shilem agia liasü.

Honibarnü Dimapur Red Cross ajanga kitchen stove 132 kibong shia nem kaka agüja liasü. Iba mapanga Chairman Chandu Agarwal, Vice-Chairman Ajay Sethi, Honorary Secretary K. K. Paul, Patrons Mahesh Agarwal & Naresh Sethi nungertem den Muslim Council Dimapur tir, Hannan Tapadar, Public Ground Colony Chairman Teisovinuo Lotha, Secretary Mhabemo Kikon aser Dubasi nungertemi

shilem agia liasü.

Dimapur nung meimchir nem teyari agütsütsü atema patrons, life members aser volunteers temi maneni yariba atema pelar. Ano maneni Dimapur Red Cross indang 2020-21 atema patron ter, Arinjay Kumar Jain, Sanjay Kumar Jain, Amit Sethi, Naresh Jain, Monoj Bhattacharjee, Prashant Agarwal, Vikas Jain, Anil Kumar Jain, Ashok Kumar Sethi & Andrew Ahoto Sema nung dang November 17, 2021 anepdang 10:30 ako nungi tenzüka Durbar Hall, Raj Bhawan, Kohima nung Nagaland Governor aser Chief Minister ajanga Patrons narokum agütsüba nunga shilem agitsü ayongzüka liasü.

AYO aser ASU ajanga mürekmejuba sentong ayongzüksü

Dimapur, Yimpoksüi/Nov. 14 (TYO): Angami Public Organisation (APO) pur küm tepiyong Hon Jubilee benjongmung terenemshiba ka ama Angami Youth Organisation (AYO) aser Angami Students Union (ASU) lungjemer November 20, 2021 nü Kohima aser Dimapur district nung mürekmejuba sentong ayongzüka agitsü, ta AYO

sangdong ka ajanga ashi.

Iba mürekmejuba sentong ya asen yimtsüng, jila aser yimtitem müreka ayutsüba kisüing nung rangloksütsü masü saka nüburttem temang anema alitsü asoshi yimya nung temelenshi adokdaksütsü asoshi lir.

Mürekmejuba ya pei dak aser kibong nungi tenzüker asünung AYO aser ASU ajanga ajak dang iba sentong

nung yariteptsü ayongzüker, ta sangdong ajanga ashi.

Maneni lanur aser kaketshirtem danga Nagaland müreksütsü asoshi samanir ka asütsü ajungshir.

AYO aser ASU ajangasa yimtsüng aser ward panchayats, shishilemar, sorkar aser nija rejutem ajunga dang mürekmejua alitsü asoshi temolung agütsütsü ayongzüker, ta sangdong ajangasa ashi.

1 Assam Rifles puri NCC dang prangbong balala sayua liasü



Dimapur, Yimpoksüi/Nov. 14 (TYO): Kohima College nung 24 Nagaland (I) Coy NCC, Kohima pur November 8, 2021 nungi tenzüka tang tashi agia aruba Combined Annual Training Camp (CATC-38) nung shilem ka ama iba training nung adenba NCC Cadets tem dang HQ IGAR (North) kübok 1 Assam Rifles, Lushai Battalion ajanga Kohima nung November nü Weapon & Band Display sayua liasü.

Iba sentong nung Kohima NCC Group kübok 24 Nagaland (I) Coy indang Senior Division aser 1 Naga Girls Bn indang Senior Wings nungi NCC cadet 120 shi tejangraba tulu nung shilem agia liasü.

Cadet tem dang 1 Assam Rifles, Lushai Battalion indang instructor temi Indian Army indang nok-o-nü balala rasaa shia liasü.

Item prangbong aser hadir balala sayuba ajanga cadet aika

Armed Forces nung adentsü ajungmesoa liasü.

Brig K Venugopal, SM, Group Commander Kohima NCC Group tenüing nung Col Daniel Lotzem Commanding Officer, 24 Nagaland (I) Coy NCC Kohima ajanga Col UC Sati, Commanding Officer aser 1 Assam Rifles, Lushai Battalion züngsem ajunga dang pelaba lematera liasü, shirnoki cadet tem tesem tonga anir aoba den külemi süngo jemdakja liasü.

Minister Neiba Kronu-i Khusatho Pochury asükhü lemsatep

Dimapur, Yimpoksüi/Nov. 14 (TYO): Naga Hospital Authority Kohima nung November 14, 2021 nü Khusatho Pochury asüba osang angashia ni kanga jashir, ta Minister, Planning & Co-ordination, Land Revenue, Parliamentary Affairs, Neiba Kronu-i sangdong ka ajanga ashi.

Pa ya Pochury kin nung Post Graduate mezüingbuba liasü. Pa anaben tashi MLA shimteta liasü aser NPCC indang Vice President inyakdangogo. Pa ya ajemalur, mapa nung bendanga agütsür inyaker aser dangar ajungmesoba lenir ka liasü, shibai yimten yimsüsür aser social worker ka ama jenjang balala nung nüburttem tenzüka aruogo, ta Kronu-i ashi.

Pa asüba ajanga asen asoshi ajamaluba lenir tajung ka samaogo, shibai nübür ajungmesoa liasü. Mangyimer kibong den asükhü lemsateper aser pa tanüla tesunep nung

anisingzükjangma, ta Minister Kronu-isa ashi.

Taoba mapang MLA inyaka alisang Khusatho Nyusou ajungbena asüba osang angashia ni aoksar, ta NPCC tir, K. Therie-ia sangdong ka ajanga ashi.

Asür Khusatho Nyusou ya Chakhesang Tribe tenteter aser FGN Commissioner ama tenzüksang Asür Lesümo'er jabaso liasü.

Asür Khusatho Nyusou dak tebu temoatsü liasü aser 20 Meluri Assembly Constituency nungi anaben tashi MLA shimteta liasü. Pa ya Congress MLA tashi tait ka liasü, ta Therie-i ashi.

Küna timtem mapang külemi liogo. Pai Naga nung asoshi mapa tajung inyakba teti bilemtetsü.

Küden NPCC züngsem ajungai mangyimer kibong den asükhü lemsateper. Tulusang Tsüngremi par kibong nung tesunep agüjangma, ta Therie-isa ashi.

LCDJ puri Children's Day nungtem nung tetoktepba sentong ayongzüker



Lions Club of Dimapur Japfu nungi ketdangsürtem den fancy dress tetoktepba nung shilem agirtem tangokba noksa ka yangi angur.

Kohima, Yimpoksüi/Nov. 14 (TYO): Lions Club of Dimapur Japfu puri Children's Day nungtem nung St.Mary's Higher Secondary School, Dimapur nung azüngertem asoshi fancy dress tetoktepba sentong ka November 14, 2021 nü ayongzüka liasü.

Kasa anogo World Diabetes Day nungtem nung Lions Club of Dimapur (Blue Venda) ajanga

nüburttem temang anema alitsü ajungmesoa 'Walkathon' ka ayongzüka liasü.

Club ajanga item tetoktepba nung takok angur nem sempet tajung agüja liasü.

Walkathon sentong nung Lions Club of Dimapur Japfu tir, Lanthuironglu Rongmei aser tezülür, Sanjay Thapa natia shilem agia liasü.

Ozüing alema Teak Veneer plywood sheet bena alir pezü apu



Dimapur, Yimpoksüi/Nov. 14 (TYO): Security Forces aser Divisional Forest Office ajanga nisung pezü ya apu aser parnok ket nungi sen crore pezü shi jenjang ozüing alema abenba Teak Veneer plywood sheets nguteta liasü.

Pua alirtem den parnok ket nungi ngutetba oset ya maneni bushisüingdangtsü atema Forest Range Dimapur nem agütsüogo, ta sangdong ajanga ashi.

Security Forces aser Divisional Forest Office ajanga nisung pezü ya apu aser parnok ket nungi sen crore pezü shi jenjang ozüing alema abenba Teak Veneer plywood sheets nguteta liasü.

Pua alirtem den parnok ket nungi ngutetba oset ya maneni bushisüingdangtsü atema Forest Range Dimapur nem agütsüogo, ta sangdong ajanga ashi.



Dimapur District Legal Services Authority ajanga Pan India Legal awareness aser outreach campaign tembanga Children's Day anogomung nung tanurtem azüdokshi aser mapa tamajung nungi kumzüka ayuba nung ajemdaker Chang Baptist Church, Dimapur nung tanur aser lanurtem den sentong ka ayongzüka agia liasü. Iba sentong nung Seyielenuo Mezhi, CJM & Secretary ajanga lokti ayongzüka liasü, kong POCISO Act, Cyber crime, Consumer Protection Act, 2019 aser Juvenile Justice (Care and protection of children) Act onüktem nungi jembia liasü.

Assam Rifles-i Padma Shri angur Lalbiakthanga tushi

Aizawl, November 14, 2021 (Agencies): Honibarnü Assam Rifles-i India nung journalist tejen Lalbiakthanga Pachuau-i Padma Shri anguba atema tenünsang agütsüogo.

Aizawl kübok Khatla nung Assam Rifles-i sentong ka ayonga agi. Iba mapang war veteran nungi journalist akümsang Lalbiakthanga Pachuau nem tetushi den trophy aser tanga sempettem agütsü.

Iba sentong nung Assam Rifles DIG Digvijay Singh aser tanga Assam Rifles ketdangsürtem aden. Kasa sentong nung Pachuau den organisation president Zonunsanga Khiangte densema Mizoram Journalists' Association (MJA) indang lennirtemia shilem agi.

MJA akhüm kübok Mizoram State nung journalist ajak inyaker. Iba tentet kübok züngsem 200 jungnüa lir.

2020 küm Mizoram nungi

litterateur C. Kamlova (Literature and Education) den külemi Literature and Education-Journalism nung Pachuau nem Padma Shri agütsütsü sangdonga liasü.

November 8, 2021 nü Rashtrapati Bhavan, New Delhi nung award agütsü sentong agiba mapang Tir Kovind-i Pachuau aser Kamlova nem award agütsü.

Pachuau aser Kamlova dak alaka, social worker B. Sangkhumi, shiba taküm award angutsüpur rongnung tenüng sangdonga liasü, pai Padma award agizükogo.

1945 küm Pachuau-i British Indian Army indang Assam Regiment nung aden aser World War-II mapang British atema pai Japan sepaitem den raraogo aser military medal aika nguogo.

Army nung inyakba mapang, arishi küm 94 tain Pachuau-i journalism kanga jangra liasü aser 1953 küm pa mapa nungi

anenba sülen, Zoram Thupuan osangkaket den pai inyak.

Iba sülen, pai "Zoram Tlangau" tenzük, koba 1970 küm nungi yimozülur ka ama inyaka aru.

Kümsük asem atema Pachuau-i MJA nung president inyakogo. Journalist inyakba dak alia, lokti atema pai shilem tulu agiogo.

1990s mapang pa Mizoram Social Defence Union ngutet aser president (founder president) inyak, kong yi aser temesepba mozü amshiba anema pai tasiüta nokdak.

Association for Voluntary Blood Donation (AVBD) nguteter rongnung Pachuau züngsem ka liasü. 2016 küm Mizoram indang Information and Public Relations Department aser MJA ajanga Pachuau ya "India nung journalist tanubusang" ta sangdong, koba tanü tashi pa melener mali.

" Kechiaser iba Tsüngrem teti tatem makai alitsüba asen Tsüngrem lir; Tasü tongaka Pa asen lenisang asütsü." - Tenünsang Ken 48:14.



Late Imonenla
08.05.1932 - 10.11.2021

Ozü temeim kinungtsü aser tsürabur Ojala Imonenla, iba lima nungi pilaa orr onok mangyim jashi nung alidang, shirnokisa onok dang aria bilema temeim tulu sayua yaritepogo, nenok ajak dang onoki kanga pelaba metetdaksür.

Nenok temeim o agi onok mulung sünepdaksü, nenok teyari agi onok tashi itshidaksü aser nenok sarasadem agi mapa ajak topur junga tembangtetogo. Item teyari ajak asoshi nenok ajak dang onoki kanga pelar aser nenok mapa tajung ajakji onok mulung nung teti alitsü.

~ N.Talitemjen Jamir, chirnur, anükapang aser semchir semnurtem.

Shirem ka Raimona National Park nung chiok

Guwahati, November 14, 2021 (Agencies): Shirem tetsü (Asiatic black bear) ka nisung aliba tesem nungi kümzüka liasü aser Honibarnü Western Assam indang Kokrajhar district kübok Raimona National Park nung iba shirem chiok.

Hokolbarnü Assam forest department indang Kachugaon Forest Division, IFAW-WTI aser tanga NGOs den külemi nisungtemi iba shirem kümzüka liasü.

Raimona National Park indang Sanfan forest range kübok Rampur, Nabin Nagar area yimertemi iba shirem angu. Iba yimtsüng tezülen lisopurtemi iba shirem senzüba ngutet.

Lisopurtemi osang agütsüli dang, Kachugaon Forest Division kübok Sanfan forest force den Central Forest Range team ka tonga aru.

Iba team yagi Kokrajhar nung aliba MVS IFAW-WTI & AFD indang Western Assam unit, koba Centre for Wildlife Rehabilitation & Conservation (CWRC) ajanga achayanger, iba unit dang metetdaksü.

Iba shiruru meyirudaktsüi aputsü atema, wildlife veterinarian Dr. Daoharu Baro-i anir CWRC indang MVS Western Assam unit den Nazrul Islam, Field Biologist aser animal keepers Keshab Pathak aser Debojit Saikia nunger iba tesem tonga aru aser maparen asadangshia liasü.

Mapang tatsüka sülen iba shirem ya tesem tajung ka nung nemzüa liasü (iba shirem aputsü atema) aser team-i chemical immobilization/tranquilizer (ajem nung mozützü inoker prangbong nung khaloktsüba) amshia asalentongtem takok ngutet.

"Shiruru kümzüka ayutsü aser iba den külemi lokti azüoktsü ya teinyaktsü tongtibangtiba lir. WTI -MVS team teyari ajanga onoki iba shiruru kümzüikogo aser shiruru tiptema kazüdak Raimona National Park nung iba shirem chiokogo," ta Kachugon Forest Division indang Bhanu Sinha, Divisional Forest Officer (DFO)-i ashi.

Asiatic Black Bear kümzüka ya Raimona National Park nung arem shirurutem

aliba temaitsü sayur, ta Sinha-i shisem.

Mozützü agi mapang tatsüka atema süja odaktsür iba shirem kümzüka sülen, Sanfan Forest Range nung IFAW-WTI MVS team matsüngdang Hokolbar aonung shiki (cage) ka nung shirem ya puoka ayu.

IFAW-WTI MVS team (Kokrajhar) indang Wildlife Veterinarian, Dr. Daoharu Baro-i, "Iba shiruru kümzüiktsü atema tayongzüka tuluka liasü. Iba shirem tekong nung merang agi yangluba nülak ka sükoker aliba angu. Iba shiruru temang tendangba sülen, team-i iba nülak agitet aser mozü inokja anepaluogo. Hokolbar aonung piyong iba shiruru yimya asadangshiba sülen, Honibarnü arem nung iba shirem chiok," ta ashi

Iba shiruru (Asiatic Black Bear) kümzüka aser chiokba ajanga Raimona National Park nung Asiatic black Bear aliba temaitsü sayur. Tawa, Assam nung Raimona National Park ya national park ka ama jangjatetogo.

ULFA (I)-i ita asem atema ceasefire atsülanger

Guwahati, November 14, 2021 (Agencies): Paresh Barua-i aniba ULFA (I)-i ita asem atema ceasefire atsülangerogo.

"ULFA-i ceasefire ita asem atsülangerogo. Iba mapang onoki military operations kecha meinyaktsü" ta ULFA-I tanishir Paresh Baruah-i ashi.

Assam nung Covid-19 tensa nung ajemdaker ULFA (I)-i yaküm May 15 nü unilateral ceasefire aliba osang

metetdakja liasü.

Iba sülen parnokisa ita asem atema ceasefire atsülanger liasü.

Sorkar aser ULFA (I) tsüngda yimjung olemtep alitsü akok ta jembiba mapang ka nung iba osang metetdaksüogo.

Assam chief minister Himanta Biswa Sarma-i mapa tenzüka sülen nungi ULFA (I) tanishir Paresh Baruah den jembia arur ta tawa tu shia liasü.

NATIONAL NEWBORN WEEK

15TH - 21ST NOVEMBER 2021

Nü teinyaktsü inyakang Sentong Renemang

THEME: SAFETY, QUALITY AND NURTURING CARE - BIRTH RIGHT OF EVERY NEW BORN

TETSÜ ASER KINÜ TANUR KÜMZÜKA AYÜTSÜ ATEMA MOZÜ KIDANG DANG KINU TANUR ASOTSÜ MERANGANG.



Kinü ka taküm nung mezüngbuba Hopta 4 ji kanga dang kanga tongtipang.



Iba mapang nung tasüba ajurutsü akok anungji kanga junga anepalutsüla



Kinü asoba sülen tetsü mama jemdaktsütsüla (ghonda tesadang tsüngda) aser ita 6 jemdaktsütsüla.



Kinü merüka yuang, tepela zü takong aser merüka yuang, mozü kecha meinoktsüla



Kinü talem yujang



Vaccine ajanga noktangtetba TB, Polio, Tetanus, Hepatitis-B, Pneumonia, Diphtheria, Japanese Encephalitis, Measles, Rubella, Diarrhea etc kümzüka ayutsü atema mapang shitak nung mozü agüjang.

ALWAYS FOLLOW PRECAUTIONARY MEASURES



For more information visit your nearest Health Unit
FOLLOW US
@NagalandNhm
nhmnagaland



TIR YIMYIM

YIMOBILEM (EDITORIAL)

DIMAPUR TENTONÜ, YIMPOKSÜI (NOVEMBER) 15, 2021

Khristan Lanurtem Angazükdak

Asenok Khristan loktiliba nung tajung kaji taintem dang masü saka tanurtem aser lanurtem asoshia parnok Tsüngrem o nung dang masü saka pei tsürabur sobaliba, awashi aser oshi nung wainshin meteta akümtsü asoshi sabang tentetsür aser sentong tapu balala agia itemji angazüksü asoshi senotsüa mekurui lezmüksür. Iba jagi yimten aser loktiliba nung shilem tajung agirtemji teimbaka arogo nung tila asüdang nungi Sunday school aser Youth (akhidangbo CYE telok) nung shilem agirtem nungi adoker. Aji oda, tila asüdang telok nung Lai tekong ka züngdaksüba mesüra ken ka tendaksüba aser lanur kümer külenbo telok nung o jembia tenzükba ajakji tain kümer arogo aser yimten nung lokti khuret bena ketdangsuba mapa inyaksü asoshi anitetba mapatem lir. Ibayongji, arogo aika nung tanurtem sentep (Child & Sunday school) aser lanurtem sabang (Youth department / Ministry) asoshi kanga süokia ia kiojen yanglutsüba, tesayurtem anepaluba aser sentong balala ayongzüka akatsü asoshi ajungshiba angur. Item tentet aser sentongtem rongnung tongtibang aser jangratemtsükaji, lanurtem sabang Youth Ministry ya lir. Tanur asüba mapang tashi, tangaleni moi, pei alidak tanurtem sentepsenji nung dena Lai o aser kentenmenü tapu balala angazüker. Aser kodang, aiür asangur kümdir, idangjibo pei alidak tesem aser arogo nung dang masü saka among adena oa tangar dena külemi sentong balala nung shilem agi tenzükba aser idangji tangar lima, tanga yimtsüng aser town angur aser tangar sobaliba angazüker aser meteter. Iba jagi shisatsü uludaksür aser tokolok renloker. Aji oda, yimtak yimtsüng nung alirtemi town angur aser town nung alirtem yimtsüng angur. Idangji, lanurtemi pei lima nung yimtsüng aser town nung alirtem tia metetter. Ashiko, yimtak alir kar asoshibo town nung longru ki atongtepa süa aliba angubajia tasen asütsüa akok, iba amaji town nung alirtem asoshi yimtak ki ka nung anenba aser ariju ama ki balaka yanglua angubaji mezüng tasen asütsüa akok. Iba ama nung jagi lanur ka kolok nung tebilemdangtsü aser tasüngdangba aika enoktsür aser pei lima aser nübortem asoshi inyaksü bilem tenzükdaksür. Iba amaji bendanglen pi den dang masü saka pei nisungtem ajurua jajadang sobaliba angazüksü jangradaksür. Akhidang, küm ishika jakdang, ABAM kübok Ao arogo nung lanurtem telongjem telok dang Christian Youth Endeavour (CYE) ta jaya aliba mapang, küm shia lanurtem lokti senden arogo shia nung adenshia CYE Convention liasü. Iba lanurtem lokti mongdang ya arogo temi raktepa ani, anungji küm ka yimtsüng arogo balaka nung aser küm ka town arogo ka nung ta pei ataba küm tesem balala nung lanurtem mongdang lia aru. Iba jagi lanurtem aika pei lima nung süaka kodanga mangutsüba yim aser tesem angur aser mongdang ayongtertema anibelem langa temoatsü aser tangazükba liasü. Kasaji, Ao Kaketshir Mungdang (AKM) bo tanü tashi yimtsüng balalai raktepa anir. Ajisüaka, kechikomaka ser, ABAM kübok lanurtem mungdang, Youth convention, yabo küm ishika Impur nung dang munga arudagi. Atangji, ajak asoshi Impur ya tongtibang tesem ka lir, anungji angutsüla. Ano, Impur nung pei apokatsü bener sendenba jagi tangar shinga nema khuret magütsür. Ajisüaka, lanurtem Impur nung adenshia amongdangji pei nübortem libaliro aser sobaliba aika majangshir aser shitakba nübortem aliba yimtsüng aser town-tema mangur. Itemji medemdanga kodang bilemdangdir, rongsen nübo endoka belemyonga, akhidang amato, tayonger aser tagizüker dang lira, yimtsüng aser town arogo nung Youth Convention amongba nung lanurtem atema teti tajangzük liasü ta angatetter. AKM lokti mungdang aser ABAM Youth Convention ama yimtsüng aser arogo ayongzüka akaba agi, tangar den metettepba tajangzükjibo yutsür asenok yimer o yimer nata mapa tapu balala külemi inyaktang metetteper aser longjemadoker. Aji oda, pei alidak lokti mongdang agizüka amongba ajanga yimtsüng nung teti atema terenlok mapa inyaktetter. Nisung karbo taküm nung pei yimtsünga mengudangtsü purtem pei yimten aser arogo lokti mongdang ayongzükba ajanga angur. Item tajangzüktem indangji bilemdanga, akhidang ama Laishiba züngtepba, metetba aser kentenmenü yimya balala nung tetoktepba sentong balala yanglua ABAM Youth Convention ya tanir aser tagizüker arogo danga lira, Impur nung dang memongi tesem balala nung sentong tajung tulu ayongzüka amongtsü ajungshir. Ibaji Khristan lanurtem asoshi pei class takdang aser pei ki aser arogo adena oa teti asoshi tagitsü angazükdak tesem tajung ka lir.

OLEMSABANG

ABAM SANEN LUDEN TELEMTETBA MEYIPA AGITSÜ MADOKER

~ Dr. Songsongsangba Tzudir

Molungyimsen Arogo Sesquicentennial Molungkimong Arogo tenzükba anogo 22 December 1872 nung ajemdaker 2022 küm amongtsü sentong nung ABAM nungi temoatsü agia amongtsü Executive Secretaryba O jembitsü jaokba ABAM Sanen Luden telemtetba nung ajemdaker shilem magitetsü sa akümba osang metetdaksü

Iba shilem magitsü metetdaksüba tajemtaktak ya, ABAM TEMZÜNG (Revised 2016) aser ABAM NÜKLA 2030 (2016) Jili O nung yamai shia lir: "AMERICAN BAPTIST FOREIGN MISSION AJANGA MEZÜNG AO NAGA BAPTIST AROGO 22ND DECEMBER 1872, MOLUNGKIMONG NUNG DR. E.W. CLARK-I TENZÜK." Iba ya ABAM Inti Mungdang 2016 nung mungdangpur-i taka metonga agizüka ayuba lir. Aser 2022 Sesquicentennial dak sendakba nung ABAM-i Molungkimong aser Molungyimsen Arogo dangi shity ka 9 April 2020 nung yok aser iba shity nung ABAM TEMZÜNG (Revised 2016) aser ABAM NÜKLA 2030 (2016) Jili O nenshia "ABAM tenokdak dak aser telemtetba ama meliteter den ABAM-i kecha shilem magitsü" ta zülü. Anungji, ABAM Sanen Luden-i kechi telemtetba agi, iba ya ABAM inti Mungdangi lemtetba nung nenshia "December 22, 1872 nung Molungkimong nung mezüngbuba Ao Arogo tenzük aser tanga Ao Arogo ka danga metenzüki liasü" ta zülü. ABAM-i Molungyimsen Arogo 2022 nung Sesquicentennial amongtsü sentong nung Executive Secretary jaokba shilem magiteter ta zülubaji meratatsü atema jangjatsür.

Tanü Ao Arogo lipok otsü jembidang aser züludang 1986 ABAM Resolution No. 40 kisüng nung rangloker jembira tangatetbaji mayimjemer. Aser ano ABAM 1986 Resolution No. 40 nung tashi mait itemi ajiteter:

- (I) 1986 ABAM lemtet Resolution No. 40 nung, "1940 nung Ao Mungdangi tasüngdangba yokba nung telangzüba agütsüba nung Molungkimong Arogo-ia par arogoji 1919 nung tenzük ta langzüba kuliji angur." Kesa tasüngdangba nung Molungyimsen Arogoi "Molungyimsen Arogoji Molungyimchen (Molungkimong) tenzükba Arogoji lir ta agütsü." 1940 küm Molungkimong Arogo nung Pastorji Molungyimsen nung David liasü aser pai Molungkimong Arogoji 1919 küm tenzük ta report agütsüba lir. 1940 nung Pastor David-i Molungkimong Arogo tenzükba report yamaji yokba ajanga "Molungyimsen Arogoji Molungyimchen (Molungkimong) tenzükba Arogoji lir" ta Molungyimsen Arogoi agütsüba medentsünüba ta angateter. 1919 küm ya Rev. Longwell-i Impur nungi Repalemba Molungyimsen nung Molungkimong-i tesayur aser pastor inyaksü yok. 1980 September 16 "ABAM aser Molung Research join Committee Repalemba den par kidang mensem akadang tsürabur Repalemba Statement document nung aliba yangi zülur: Rev. Arsenbai tsürabur Repalemba dang "Tsüngrem tenüng nung nai ochi shiang" ta ashi, aser Tsürabur Repalemba yamai langzü, "Ni Molungkimongi arudang Molungkimong nungeri Deobarnü among monga liasü, aser tamanger itemi liasü - 1. Noklennungang, 2. Renemkaba, 3. Sowamongba, 4. Olemjungba, 5. Ozunglemba, 6. Korajungba, 7. Lanukaba, 8. Imnukenba, Posemla (Pamila). Tsürabur Repalemba statement ajanga Molungkimong Arogo 1919 nung tenzük ta asubaji aitsür.
- (II) 1986 ABAM lemtet Resolution No. 40 nung Molungyimsen Arogo Molungkimong yimdak tenzük ta angateter ta agütsüba, 1940 küm Molungyimsen Arogoi "Molungyimsen Arogoji Molungyimchen (Molungkimong) tenzükba Arogoji lir" ta agütsüba nung tangatetba agütsüba.
- (III) 1986 ABAM lemtet Resolution No. 40 nung Molungyimsen Arogo disband asüba indang nung, "August 19, 1894 anogo ka nung dang süaka arogo khen anendaksü (disband asü) aser ghonda ishika lir ang tenzükshi" ta alibaji ghonda ishika masü saka 19 August 1894 anepdang sentep sülen disband asüba 23 September 1894 anepdang sentep nung tenzükshi. Anungji, ghonda ishika atema masü anogo 35 lir.

Anungji tesüba tatalokbatem khen meyipa reprangdi. 1960 Ao Arogo Anogo Special Committee Report ajanga yamai telemtetba agütsü: "Temalen agüja aliba kulitem ajanga Special Committee-ibo Dec. 23 1872 nung tenzük ta shiteter." Iba sülen Molungkimong Arogo Centenary 1972 nung amongtsüba renem. Saka iba mapanga ano tashishitep liasü, kechiyong 1940 küm ABAM-i Ao Arogo ajak dangi pei Arogo tenzükba küm asüngdanga züluba nung Molungyimsen Arogoji 1872 küm Molungkimong nung tenzükba lir ta ABAM nem agütsür liasü.

1967 Küm taoba ABAM Executive Secretary Rev. L. Kijung Molungkimongi aludang pai shidakbo Ao Arogo Centenaryji Molungkimong nung amongtsüla, ta ashi saka Molungkimong yimji tila, aser tejaoker foreigner dena aika anentsüsa metemsü aser lenmang tajung maka. Anungji, asenok ajak Impur nung külemi mongdi ta ashi. Saka, aji Molungkimong-ia pei sasep balaka Molungkimong nung mongnüba agi ABAM-i ashiba nung memolung. Molungkimong nung mezüng Arogo tenzükji onok tama mongdi ta ABAM dang ashi.

1971 küm Molungkimong Arogo Rev. L. Kijung den Impur nung ajurutepa Molungkimong Arogo Centenaryji 1972 October 13-15 nung amongtsü lemtet. Iba ya ABAM Executive luden nung metetdaksüba sülen ano tashishitep adok. Iba tashishitep adokba nung ABAM nungi Molungkimongi alua mensem akadang tatsühtep adokbaji ABAM-i Impur nung tama mongnü, aser Molungkimong nung mezüng Ao Arogo tenzük nungji Molungkimong nungeri Molungkimong nung Arogo Centenary benjongji tama amongtsü ta nokdak. Iba tatsühtep ya tatembang kati maruteti senshi. Aser ABAM-i October 5, 1972 nung yamai dang zülur yok: "Molungyimjen (Molungkimong) arogo tenzükba küm 100 jubileeji Dr. Clark Record-i tuyuba ama küm agi mabensa nungji ABAM-i shilem magir." Yamaji ABAM-i Molungkimong Baptist Arogo Centenary benjung nung shilem magi-e sülogo.

(Maneni asüng adok nung...)

METONGSHIR

Tir Yimyim November 14, 2021 adok nung "ABAM Sanen Ludeni 1986 ABAM lemtet khen junga shisadangdaksüner" ta Olemsabang nung adokba ocet nung "Tapak 9 1896" ta alibaji "Tapak 9 1898" ta melenshia azüngtsü mepishir.

- T. Lanutoba Ao

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Diezephe Christian Fellowship pur küm 25 ajungba Jubilee among



November 14, 2021 nü Diezephe Christian Fellowship, Dimapur küm 25 Jubilee mong nung Rev. Dr. Zelhou Keyho aser tangartem tangokba noksa nung angur.

Dimapur, November 14 (TYO): Amongnü Diezephe Christian Fellowship, Dimapur pur küm 25 ajungba Jubilee mong mongogo; iba sentong nung tetushi tejaokerji Nagaland Baptist Church Council (NBCC) General Secretary, Rev. Dr. Zelhou

Keyho liasü. Iba sentong nung jembidang Rev. Dr. Keyho-i Diezephe nung dang tanela nung longjema alitsü ayongzüka liasü. Paisa Diezephe nung dang Diezephe ya tangari tatishitsü tajung agiba yim ka

akümtsü aser ajak tesünep nung alitsü ayongzü. Iba sentong takok ngua agiba atema DCF executives-i tetushi tejaoker, shilem agirtem, Diezephe yim kübok aliba Arogotem, sponsors aser temeimer ajak dang pelaba lemsatöp.

Myanmar nung Khristantem densema million 3-i teyari nungdaker

November 14, 2021: United Nations-i, tang Myanmar nung tensa tamajungba akümer aser iba linük nung Khristantem densema nisung million 3 dak temai tang rongdak teyari balala nungdaker, ta metetdaksüogo.

facilities amakbaji international humanitarian ozüng kübok memelar, anungji sepaitemi item mapaji tangsa anentsüla, ta paisa metetdaksü.

tashiyim amshiba anentsütsü aser democracy sorkar amenoktsütsü atema tenangzüka agiogo.

UN Humanitarian aid tongti, Martin Griffiths-i, "Iba linük nung rara manener aser iba tensa ya ano tamajungba dang akümtsü," ta metetdaksü.

United Nations-i maneni nenshia sepaitem dang nüburtem taginüba akhümtsübutüsü aser linük nung democratic sorkar amenoktsü mepishir, ta metetdaksü.

November 8, 2021 nü US Secretary of State, Anthony Blinken-i, "Myanmar nüburtemi democracy aginüba, meimchir t e m e d e n akhümtsübudaktsünüba aser linük nung tzü-züng ozüng lidaktsünübaji onoki akhümtsübur. Iba linük nung tai maket nisung 1,300 dak tema süogo," ta metetdakja liasü.

Talisa northwest Myanmar nung sepaitem aser telok balala tsüngda raraba, Chin state nung sepaitem aser Chinland Defense Force tsüngda raraba aser Magway aser Sagaing regions nung sepaitem aser People's Defense Forces tsüngda raraba ajanga tensa ano tamajungba kümogo.

UK-i mepishiba nung ajemdaker tawa UN Security Council-ia senden mena Myanmar tensa atema o lemtepogo. Myanmar general election nung democracy lenir, Aung San Suu Kyi-i aniba National League for Democracy (NLD)-i takok anguba sülen küm ka ajungba mapang ka nung UN Security Council senden ya amen.

European Union-ia, Chin state nung sepaitemi civilian aser yimtsüngtem amakbaji onoki sashia aitsür, ta metetdaksüogo. European Union-isa, Myanmar nung nüburtemi democratic inyakyim nung shimba sorkar ka sepaitemi atsüngdokbaji onoki sashia aitsür; iba ya nüburtem taginüba anema inyakba lir, ta aitsü.

"Tawa tanur aser tetsür densema nisung 37,000 shi jenshiogo aser Tenla ki densema ki 160 dak tema rongdoktsüogo," ta Griffiths-i metetdaksü.

Taküm February 1 nü sepaitemi tashiyim amshia NLD sorkar atsüngdoka democracy lenirtem aika pua liasü.

EU foreign policy tongti, Josep Borrel-i, "Chin state nung sepaitemi yimtsüngtem aser nüburtem amakba, reshikangshiba, tashiyim amshia taküm raksatsüba, nisung pua ayuba aser nija kiojen den tamangba yimsü dak sendakba kiojentem raksatsübaji European Union-i sashia aitsür," ta metetdakja liasü.

Tang Myanmar linük telung nung nisung 223,000 dak tema jenshia lir aser iba dak alia Rakhine, Chin, Shan aser Kachin state tem nungia nisung meyrjang aika jenshia lir, ta United Nations-i metetdaksü.

UN otongdar, Stephane Dujarric-i, "United Nations-i maneni nenshia sepaitem dang nüburtem taginüba akhümtsübutüsü aser linük nung democratic sorkar amenoktsü mepishir," ta metetdaksü.

European Union-i sashia aitsür," ta metetdakja liasü.

Nüburtem aser nüburtem meyong kiojen amakba, humanitarian workers aser

US State Department-i Myanmar nung sepaitemi



November 13-14 anogotem nung Khriesariiii Krotho (CYE) Christian Revival Church, Naga Hospital Colony, Kohima Golden jubilee sentong nung Jubilee choir tem tangokba noksa nung angur. Jubilee nung o jembirtemji- Rev. Dr. Neikedozo Paphino, advisor, Nagaland Christian Revival Church, Rev. Kehouelie Zatsu, Pastor, CRC NHC aser Vimeddo Keyho, Assistant Pastor CRC Chedema Bawe nung liasü.

ANOGO ABEN TSÜNGREM DEN

Tenzüktsü anunger

Ne nüburi na raraba anogo nung peisasa mulungteta adoktsü. T. Ken 110:3

Asentenshiba tamaitüsü kaji, koba mapang nung Tsüngrem ain nung Pa nübur dangi arur pa tenzükba mapa nung parnok taküm agütsütsü anungbaji lir. Arogo aika nung Tsüngrem mapa nung bendanga agütsür nübu agi anünga lir. Pa talangzüka mapa nung yaritepa inyaktsü temulunger nübu mangur. Tsüngrem tenangzüka mapa mangashir aika dang lir aser Khristantem item mission wadang jagi aotsü ayimtener. Asenoki nungdakerbaji temulunger aika adoktsü mepishitsüba masü saka Tsüngrem ain yokang ta mepishitsüba lir. Kodang Tsüngrem Pa ain nung nübur dangi arudir pa mapa asoshi temulunger nübu aser teyari agi anünga malitsü!

Tanü Khristan aikati aser arogo aika nung missionji mezüngbuba mekümdaktsür. Ibai kechiba süra asenoki asen ajaba lemanji samadok. Asenoki kotaki aotsü temsüa akümtsü atema dangbo mekümsük. Tsüngremi asenok samaa aliba lima kümzüksü asoshi Pa den külemi inyaktsü asoshi kümzü. Asenok Pa den tesendaktep akaba ajanga Pa mission asenoki inyaktsü akok.

Tsüngrem ain ajanga dang asenok pei atema dang bilemba nungi anitettsü akok aser mission tsütsüi meyipdaktsütsü akok. Parnok aruba lenmanji ibaji dang lir. Pa ain asenok ajanga sayutsü asoshi asenok dak tagizükba temulungjang akatsü nungdaker. Isaia den, "Ni yangi lir, ni yokang!" ta shitettsüsa ne mulungjang Tsüngrem meimba agi sünga lir ma ?

Longsa Senso Moria Mission tenzükter küm 50 jungogo



Longsa Senso Moria Mission hon jubilee sentong nung Tsüngrem osang abener ABAM Executive Secretary Rev. Dr. Mar Pongen, Pastor Rev. Dr. Alemrenba, Missionary Mapula aser sentong nung tongti shilem agir kar noksa nung angur. Mokokchung, 14th November 2021.

Mokokchung, Nov. 14, 2021

(TYO): Longsa Senso Moria Mission tenzükter küm tenem (50) ajungba jubilee mung "sentsüwangshi nüchi" dak rangloker Longsa Baptist Arogo nung Nov 13 & 14 anogo ananü takok manung nung mungogo.

Imti, Kohima Longsa Senso Telungjem tir Wb. Onen, Dimapur Longsa Senso Telungjem tir Wb. Imtizülü parnoki sentong balala nung jubilee salem o den tayongzüka o tulu lemsatöp.

Iba sentong nung Tsüngrem osang abener; Ao Baptist Arogo Mungdang Executive Secretary, Rev. Dr. Mar Pongen-i "sentsüwangshi nüchi", IEF Missionary Wt. Mapula-i "Tsüngremer mi nung rongshidi" aser Delhi Ao Baptist Arogo Pastor Rev. Dr. Alemrenba-i "ali tatem tashi Kibubar mi tsükloksüdi" onük nung ajemdaker Tsüngrem o tarok bener arua jubilee mungertem ayongzü.

Working People's Bible College tenzüksang tsürabur Rev. S. Temjen-i jubilee nungtem adokba nungo kaket "Tsüktetlung" sayatsü. Iba kaket nung Longsa Senso Moria Mission-i küm tenem (1971-2021) tsüngda tenyaba mapa inyakba, Moria Mission tamendakdak aser tzüpokdak, Longsa lima arogo asendenshi milak jangruba otsütem temenungratsüka shia angutsü.

Longsa Village Council Chairman Wb. Talichuba, IDAN Chief Executive Officer Wb. Alemtemshi Jamir IAS (Retd), Horticulture Deputy Director Wb. S. Senka Jamir, Mokokchung Town Longsa Senso Telungjem tir Wb. K.

Sentong nung Longsa Baptist Arogo Choir-i anir telok aser kijai ken ajanga Tsüngrem osang abenba ajanga tesentepertem saksalemdaktsü. Longsa Senso Moria Mission hon jubilee ranglok nung Missionary balala yokertem den temeja sentong tajung ka agia liasü.

OLONG PAITEP # 5997


1		2		3		4	5			
				6						7
		8								
9				10		11				
			12						13	
						14				
16						17				

- | | | | |
|----------------------------|-------|--------------------------------|-------|
| TIPIEN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S _ _ _ i | - (3) | 5. Yim lenmang | - (5) |
| 9. Nisung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Majinü | - (5) |
| 13. Tsük rizüngdak | - (3) | 13. Tzüma nung senzüba | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

OLONG PAITEP # 5996 TELANGZÜBA

- | | |
|---|--|
| TIPIEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |

Agüja aliba noksa nung meputepi aliba 6 bushiang



TANÜBO NAI LANGZÜANG

Q. Global Drug Policy Index 2021 nung India koba jenjang nung lir?
 [A] 10 [B] 18 [C] 25 [D] 30
 (Taruba adok nung onoki langzüsü)
YASHI ADOK TELANGZÜBA: Karnataka

AO OSHI ANGAZÜKDAK:

TANÜ ANGAZÜKTSÜBA OJANG

Lentong
 (n) ali atüsü atema abang talang nung merang taju janga yangluba oset (earth digging tool)
 * Ki yangludang **lentong** kanga nüngdaker.

Lepa
 (v) meyip (return)
 * Onok len tom nungi **lepa** kidangi shilang.

NAI-A YA METETTER MA

- INDIA NUNG NÜNGTUGU YOUTUBER KAR:**
- #1 **Bhuvan Bam**
 Youtube Channel Name :- BB Ki Vines
 Subscribers :- 20.4M
 Net-worth :- \$3. million
 Channel Content :- Adult Comedy and Drama
 - #2 **Amit Bhadana**
 Youtube Channel Name :- Amit Bhadana
 Subscribers :- 23M
 Earnings :- 25 Lakhs +
 Channel Content :- Adult Comedy
 - #3 **Nisha Madhulika**
 Youtube Channel Name :- NishaMadhulika
 Subscribers :- 11.3M
 Earnings :- \$90K - \$165.3K
 Channel Content :- Cooking
 - #4 **Gaurav Chaudhary (Technical Guruji)**
 Youtube Channel Name :- Gaurav Chaudhary
 Subscribers :-21.1M
 Earnings :- \$90K - \$165.3K
 Channel Content :- Technology and Gadgets
 - #5 **Ashish Chanchlani Vines**
 Youtube Channel Name :- ashish chanchlani vines
 Subscribers :- 24.3M
 Earnings :- \$11.5,000 - \$180,000 per month
 Channel Content :- Comedy
 - #6 **Dr. Vivek Bindra**
 Youtube Channel Name :- Dr. Vivek Bindra: Motivational Speaker
 Subscribers :-16.2M
 Earnings :- \$4,000 - \$69,000 per month
 Channel Content :- Motivational

SUDOKU # 6038 TELANGZUBA # 6037

			3	9	4	8	1	2	5	9	4	8	3	6	7	1	
4	2	9	1	5			7	1	4	8	6	5	7	3	2	9	
	1	8		4		5		3	7	6	2	9	1	5	4	8	
	4		9			5		4	9	7	5	2	8	1	3	6	
9	3	5	4		2			5	2	1	3	7	6	8	9	4	
	7	2	5	3	8		1	8	6	3	1	4	9	7	5	2	
7			8	1			2	9	8	2	7	1	5	4	6	3	
		3				8		6	7	3	4	8	6	2	9	1	5
		4	6	5	3				6	1	5	9	3	4	2	8	7

OJANG LUTEP # 5584


- SUNING :
- IDANJASHG :
- MPTOEREKBA :
- ETOS :
- RAKSMEARA :
- JIIDAK :
- LTAI :
- GAN :
- IMT :
- OKEADR :

OJANG LUTEP TELANGZÜBA # 5583

AGINÜBA AJAK INYAKTSÜ MERANG DANG KA NUNG DANGA TAJANGZÜK MANGU

TAN HOPTA ATEMA - KOMA SÜLA ?

Q. Nagaland government-i bilemba ama, Nagaland nung Municipal aser Town Council-tem ya election magii dang tentet nunga koma süla ?



November 14, 2021 nü New Delhi nung Ato kilonser, Narendra Modi-i Punjab, Delhi aser Jammu & Kashmir nungi BJP lenirtem telok ka ajuruba noksa nung angur. BJP lenirtemi shidi ka ajanga Ato kilonser dang Kartarpur Corridor tanaben lapoktsü mepishi.

Zyduş Cadila indang Covid vaccine tain nem dang agütsütsü

New Delhi, November 14 (Agencies): Zyduş Cadila-i yangluba coronavirus vaccine ZyCov-D ya arrshi küm 12 ser temapurtem nem agütsütsü atema India drug regulator-i agizüka liasü, saka tang atemabo iba vaccine ya national anti-coronavirus vaccination programme kübok taintem (arrshi küm 18 ser tema) nem dang agütsütsü, ta osang ka ajanga metetdaksü.

Union health ministry-i linük nung ZyCov-D vaccine ya agütsütsü atema melaogo; iba vaccine agütsüdang ajem mamshitsü, aser iba vaccine ya kobi melii agütsü tenzüktü.

Union ministry-isa Ahmedabad nung amenoka aliba Zyduş Cadila company indang vaccine dose crore 1 alizüktü atema jelia mangaogo.

Sorkar ketdangser kati, "ZyCov-D ya arrshi küm 12 ser temapurtem nem agütsütsü

atema India drug regulator-i agizüka liasü, ajisüaka tang atemabo iba vaccine ya national Covid vaccination drive kübok taintem nem dang agütsütsü," ta metetdaksü.

Brihostibarnü Union health minister, Mansukh Mandaviya-i, sorkari kanga kera tanurtem nem iba vaccine magütsüner, aser iba dak sendakba telemtebaji mongintemi ashiba nung ang ajemdaker agütsü, ta metetdakja liasü.

"Tanurtem nem vaccine agütsütsü atema mongintemi ashiba nung ajemdaker ang telemtebaji agütsü. Tanurtem nem vaccine agütsütsü atema onoki bilemdanga shisadangtsü, kechiyong tanurtemji iba linük atema tarütsü nükla lir, anungji iba dak sendakba telemtebaji kanga kümdanga agütsüla," ta Mandaviya-i metetdaksü.

Ano külen Bharat Biotech

indang Covaxin-a arrshi küm 2 nungi 18 purtem tashi agütsütsü atema Drugs Controller General of India (DCGI)-i agizükogo, ta osang ka ajanga metetdaksü.

Taintem nem ZyCov-D vaccine agütsütsü atema frontline workers aser vaccinators nem tama tongmelang training ka agütsütsü.

Zyduş Cadila-i India sorkar nem ZyCoV-D vaccine dose crore 1 agütsütsü aser parnoki sorkar dang dose shia sen 265 agi ayoktsü.

"Alima nung tang mezüngbuba Plasmid DNA Vaccine- ZyCoV-D crore ka supply süang ta Zyduş Cadila nem metetdaksüogo, aser onoki India sorkar nem iba vaccine dose shia sen 265 agi agütsütsü aser needle-free applicator shia sen 93 agi ayoktsü," ta Zyduş Cadila-i metetdaksü.

Pakistan-i India nung angopur 20 chioker

Karachi/New Delhi, November 14 (Agencies): Amongnü Karachi (Pakistan) nung aliba Landhi district jail nungi India nung angopur 20 chiokogo; parnoki ozüng alema Pakistan nung tzü nung angopur apuba atema tepuokdak küm pezü yua liasü.

Amongnü angopurtem jail nungi chiokba sülen Hombarnü Wagah arrtsü nung angopurtemji India nung ketdangsertem ket nung agütsütsü.

Landhi jail Superintendent, Irshad Shah-i ashiba agi, angopurtemji timbaka Gujarat state nungi lir, aser India nung ketdangsertemi parnok maitsü metetdaksüba ajanga Pakistan-i mapa tajung sayua parnok chioker.

"Parnok jail nung küm pezü puoka liasü aser ozü sorkari mapa tajung sayua tanü parnok chiokogo," ta paisa metetdaksü.

Melungtet telok- Edhi Trust Foundation-i angopurtemji Lahore kübok Wagah arrtsü tashi anir otsütsü, iba sülen November 15 nü India nung ketdangsertem ket nung agütsütsü.

"Onoki angopurtemji Edhi Foundation ket nung agütsüogo; sen teindokba ajak parnoki agütsütsü. Parnok Allama Iqbal

Express train ajanga Lahore-i aotsü," ta Shah-i ashi.

Paisa, tang Pakistan nung ano India nung 588 Landhi jail nung lir, aser parnok timbaka angopurtem dang lir, ta metetdaksü.

"Sindh Home Department nungi osang ka aruba sülen parnoka chioktsü, kechiyong yashi India nung angopur 20 dang chioktsü atema onok dang tuyua liasü," ta pai ashi.

Pakistan nung tzü nung angopur apuba atema Pakistan Maritime Security Force (PMSF)-i India nung angopurtem apuba sülen police nem agütsü liasü.

Yaküm küm tetenzüklena Pakistan sorkari India nung angopur 20 chiok aser 2019 küm April ita nunga India nung angopur 100 chioka liasü.

India nung tzü nung angopur apuba atema mapang shia India-i Pakistan nung angopurtem pua jail nung puoker.

Melungtet telok- Pakistan Fishermen Forum-i ashiba agi, Arabian Sea nung linük ana tsüngda arrtsü bendangtsüsa temaitsü junga mali aser angopurtem ket nung tanü asüng adokba 'navigation equipment' maliba ajanga angopurtemi memeteti arrtsü adena oor angopur.



November 14, 2021 nü Vigyan Bhawan, New Delhi nung 'Pan India Legal Awareness & Outreach Campaign' tatembangbuba sentong nung Chief Justice of India & Patron in Chief NALSA, N.V. Ramana (tiyong), Woman & Child Development Union Minister, Smriti Zubin Irani (abalen) aser Supreme Court Judge & Executive Chairman, NALSA, Uday Umesh Lalit nung tangokba noksa nung angur.

India nung Covid agi shiranger 1,35,918 dang kümogo

New Delhi, November 14 (Agencies): India nung ano nisung 11, 271 dak coronavirus putet aser iba tashidak agi shiranger 285 süogo, ta Amongnü Union Health Ministry-i metetdaksü.

India nung tang tashi nung nisung 3,44,37,307 dak iba tashidak putetogo ajisüaka tang teshirangdakpur 1,35,918 dang kümogo.

Tesüiba ghonda 24 tsüngda

coronavirus agi shiranger 285 asü aser tang tashi nung linük nung iba tashidak agi shiranger ajak senteperbo 4,63,530 süogo.

Tang anogo shia coronavirus positive putetba shilem 0.90 dang kümogo aser hopta shia positive putetba shilem-a 1.01 dang kümogo, ta health ministry-i metetdaksü.

Tang tashi nung coronavirus vaccine dose crore 112 dak

tema agütsüogo, iba tashidak agi shiranger 3,38,37,859 anepogo aser iba tashidak agi shiranger asüba shilem 1.35 lir.

Tesüiba ghonda 24 tsüngda samples 12,55,904 tendangogo aser tang tashi nung India nung samples ajak senteper crore 62.37 (62,37,51,344) tendangogo, ta Amongnü Indian Council of Medical Research (ICMR)-i metetdaksü.



New Delhi, November 14, 2021: Amongnü India nung mezüngbuba Ato kilonser, Jawarharlal Nehru asoba anogomong nung Parliament House nung Congress Tir, Sonia Gandhi den party lenirtem- Mallikarjun Kharge, Anand Sharma aser J P Agarwal nungeri asür nem akhüm agütsüba sülen tangokba noksa nung angur.

Opposition-i RS Chairman aser Lok Sabha Speaker na aitsü

New Delhi, November 14 (Agencies): November 14, 2021 nü India nung mezüngbuba Ato kilonser, Jawarharlal Nehru asoba anogomong nung Parliament Central Hall nung asür nem akhüm agütsüba sentong nung Rajya Sabha Chairman, Lok Sabha Speaker aser Minister tem madenba atema opposition party temi sorkar aitsü.

Iba anogomong sentong nung Congress Tir, Sonia Gandhi den party lenirtem- Mallikarjun Kharge, Anand Sharma, J P Agarwal aser tangartemi asür nem akhüm agütsü.

Rajya Sabha nung Congress' chief whip, Jairam Ramesh-i twitter ajanga, "Parliament Central hall nung asür lenirtem noksa matsüngdang parnok asoba anogomong nung sentong agia arur, ajisüaka tanüba balaka

liasü. Lok Sabha Speaker maliasü. Rajya Sabha Chairman maliasü. Minister ka danga maliasü. Iba dak alia tamajungba ataloktsü asü?," ta metetdaksü.

Ramesh indang tweet lemsatapa Trinamool Congress lenir, Derek O'Brien-ia Centre sorkar aitsü.

O'Brien-i twitter ajanga, "Joko kecha agia ni mesüngmanger. Tang aliba sorkari India nung rejutem raksatsür, iba nungji #Parliament densema lir," ta metetdaksü.

Amongnü anepdang Ato kilonser, Narendra Modi-i twitter ajanga Nehru asoba anogomong salem osang lemsatapa liasü.

Congress Party lenir Nehru ya 1889 küm aso aser India nung Ato kilonser mapang talangtiba inyaksangji pa liasü.

Ecuador tepuokdak azüdokshia nisung 68 asü



Guayaquil, Yimpoksüi/Nov. 14 (Agencies): Ecuador nung September ita tsükchir telok ana tsüngta raraba mapang nisung noklang dak tema asüba tepuokdak ano rara tasen adoka tepuokdak alir nisung 68 asü, ta ketdangsürtemi ashi.

Guayaquil yimti kübok Litoral Penitentiary nung rongrong ya Hokulbar nikongdang nungi tenzük ta ashir.

Tepuokdak ki telungi aiba police tactical unit temi yangji prangbong, tapoktsü oset aser blades tem ngutet, ta osang ajanga ashir.

Iba linük nung tepuokdak taküm nisung 300 jungnüa süogo.

September ita telok balala tsüngta azüdokshiba ya Ecuador otsü nung tamajungtiba liasü.

Iba mapang tepuokdak tesem külen nungi tesem külemi tapok yanglur oa dangar gang züngsem dak teka sangshia liasü. Iba tesem azüoktsü asoshi police aser army noklang aika yoka liasü.

Iba ama azüdokshiba nung tepuokdak alir karbo temang shilem balala kuma rangsar liasü, anungji Mexico nung aliba Sinaloa aser Jalisco New

Generation cartels ama Ecuador nunga mapa tamajung inyakba telok tem melenshir südi, ta ajiteter.

Tang tesüsa Guayas province kübok Guayaquil nung tepuokdak raraba nungya nisung 25 yirua liasü aser ita tetenzüklen rtelok tila ka raratepba mapang tepuokdak alir nisung asem kasetba ama liasü.

Honibarnüa ano yangji azüdokshiba osangtem liasü aser sepaitem tali yoksem aser iba tesem tezülen armoured vehicle tem agi müketbanger liasü.

Tepuokdak aliba kinungertem aser tembartem osang jangjatsü atema tepuokdak tesem kimalen adenshia liasü, kong asürtem tenüng post ka nung neplokja liasü.

Mapa tamajung inyakba telok ka nungi lenir ka chiokba sülen 'territorial' mangatetep ka nungi azüdokshia tenzük, ta ketdangsürtemi ashir.

"Iba tepuokdak aliba section nung tanishir ka meliasü, anungji danga telok temi aita itemji tepsettsü merang," ta Guayas province indang governor Pablo Arosemena-i osangbener dang

ashi.

Azüdokshia adokba tepuodak ya nisung 700 shi puoka liasü, ta pai ashi.

Tir Guillermo Lasso-ia Twitter nung sangdong tatsüka agütsüba nung asür kinungertem den asükhü lemsatepa liasü aser rongrong nung tajangzük anguba teloktem den raratsü atema mera tasen nungdaker, ta ashi.

Ita tetenzüklen BBC sensaksem ka nung Lasso-ibo tepuokdak tesemtem kisung masü saka temesepba mozü shibelener temi amshia aliba tesemtem tanaben azüokteter, ta shia liasü.

Temesepa mozü shibelener atema mera kechi magi, ta pai taoba sorkar aitsü aser linük nung temesepba mozü azüoktsü atema küm ter dak tema agitsü, ta shia liasü.

Telok telok tenteta azüdokshia mapa tamajung inyaktsü ajungmesoba azüoktsü atema Ecuador-i kidanger linüktem, Colombia, US aser EU teyari nungdaker, ta pai shia liasü.

Tang Ecuador prison nung nisung 9,000 dak tema yua lir. Litoral Penitentiary ya nisung 5,300 atema yanglu saka yangji nisung 8,500 yua lir.

Sudan security forces-i longkak aiter trok tepset

Khartoum, Yimpoksüi/Nov. 14 (Agencies): Mitkartemi tashiyim amshia sorkar atsüngdokba anema asendenshir longkak aitba mapang Sudan security forces temi injang aser tear gas khaloktsüba nung nisung pungo asü aser aika yiru, ta telok kati ashi.

Central Committee of Sudanese Doctors ajanga ashiba agi, Honibarnü linük yimtiba, Khartoum aser iba indang twin city, Omdurman nung nisung pungo prangbong agi kaset aser ka tear gas agi tango mesashiteti asü. Nisung aika yiru, kechiaser longkak aiter dak injang densema tashi ajunga amshia ajemreptsü meranger, ta parnoki ashi.

Mitkar indang council ajanga injang agi kasetem

rongnung arishi küm 18 tain ka aser arishi küm 35 tain ka dena lir, ta ashi.

Security forces temi Omdurman nung mozüki ka lungbanga yirur alir nisung kar apu, ta doctor temisa ashi.

Sudan nung aliba International Committee of the Red Cross tekolakba, Pascal Cuttat-i Twitter post ka nung, medical teyari agütsüba nung tetsükdaktsü magütsüsüla, ta ashi.

"Ambulance tem senzütsü melatsüla, medical professionals tem mapa inyakdaktsüsüla aser yirur alirtem anepalu südaktsüsüla. Medical mission ya kumzüka ayutsüla," ta pai ashi.

Honibarnü longkak aitba ya tesunep nung tenzük saka mapang talangka melie

meshidaki akum, ta Sudan police temi ashi. Longkak aiter temi police station tem amakba mapang police 39 kanga sashia yiru, ta police temi ashi.

Sudan mitkartemi October 25 nü tashiyim amshia sorkar atsüngdok aser Ato Kilonser Abdallah Hamdok densema ketdangsür aser yimten yimsüsürtem apu. Hamdok ya tang tashi par kidang pua yua lir.

Brehostibarnü General Abdel Fattah al-Burhan-i pasasa pa Sovereign Council nung tekolakba asütsü tanaben shim, aser kanga tsüba aliba paramilitary Rapid Support Forces lenir Mohamed Hamdan Dagalo ya pa den adongba shimtet. Mitkartemi iba tentet indang lenisüba menden ya civilian tem nem agütsüsü liasü.

PELABA LEMSATEPER

"Tejashi süitemer, saka tepor tajungbo teti alir"
- Pierre Auguste Renoir



ASO:
16.07.1933

ASÜ:
09.11.2021

Asür T. Imti Walling (Dibuia)

Onoki teti meima aliba Obala, **asür T. Imti Walling**, mapang tatsüka shiranga alidang aser tasünü kwinakati ozü den tako marok lemsatepogo, nenok ajak dang pelaba lemsateper. Arishi küm 89 tashi temoatsü nung jangratema lia aruba sülen Nuton Bosti, Dimapur nung 09-11-2021 nü teti tatem maka kidang alitsü asoshi pa jar ogo.

Khen atema aliba lima nung pa taküm meyipa reprangdangra, pa ya ochi aser temeim aketba tebu ka liasü. Pa shisatsü aser mapa tajungtem teti bilemtettsü.

Ozü asükhü mapang ana aser talang nungi shirnokisa mangyim jashi lemsatepa aser lenmang balala ajanga nungita yariogo, nenok ajak dang iba sabang ajanga ozü molungjang taroktiba nungi pelaba lemsateper.

Ozüi item nübu aser tentet dang alakteta pelaba shisemer:

1. Dimapur Ao Baptist Arogo,
2. Nuton Bosti Ao Khel Council, Dimapur,
3. Director, Officers and Staff of S.I.R.D., Kohima, Nagaland,
4. Jorhat Ao Baptist Arogo,
5. Dorians Society of Dimapur,
6. Dimapur Ao Pensioners' Telongjem,
7. Jangpetkong Senso Telongjem, Dimapur,
8. Dimapur Dibuia Senso Telongjem,
9. Dimapur Dibuiatur Telongjem,
10. Dimapur Dibuia Fellowship,
11. Dimapur Dibuia Students' Union,
12. Dibuia Walling Kidong, Dimapur,
13. Kohima Dibuia Senso Telongjem, aser
14. Faith Hospital, Dimapur nung Dr. Akumnar Jamir aser lar team.

"Tejungnüba takümüji kaa kümdaktsüsü; shibai tzü ainer pa dak tzü indaktsüsü." (Apijemtsü Shin 11:25)

- Chirnurtem, Semchirtem aser Anük-Apangtem.

Taoba Libya yimsüsür Gaddafi'er jabaso tir atema tokteptsü



Tripoli, Yimpoksüi/November 14 (Agencies): Taoba mapang Libya lenir Muammar al-Gaddafi'er jabaso Saif al-Islam al-Gaddafi-i December 24 nü agitsü aliba tir election nung tokteptsü atema Deobarnü pa tenzüng züngoksemogo, ta electoral commission nungi ketdangsür kati metetdaktsü.

Gaddafi ya tir menden atema tokteptsüpur rongnung tongtibang nisung ka lir. Iba menden atema eastern military commander Khalifa Haftar, Ato Kilonser Abdulhamid al-Dbeibah aser parliament speaker Aguila Saleh nungera tonkteptsü.

Social media balala nung noksa prokshiba nung Saif al-Islam al-Gaddafi parnok indang sobaliba süoshi aser korang (turban) semer linük anüotip len aliba Sebha yimti kübok registration centre nung kuli kakat ka nung sign süa aliba nguogo.

December 24 nü agitsü aliba election atema nüburtemi

Libyan factions timba aser bendanger tashitem pusemaka vote koma agütsürteptsü aji mejangja, kechiyong lokti balala tsüngda temzüng ozüng aser mapanglem dak sendakba nung mangatetep adoker lir.

Hokolbarnü Paris nung senden ka amenba mapang, shibai vote agütsüdaktsüsü mesera election inyakyim nung timtem agütsüdir iba nisung nem tenokdangba balala agütsüsü bangjemogo, ajisüaka iba election nung shibaisa tokteptettsü, iba dak sendakba nung temzüng ozüng tejangja ka agizüka mali.

2011 küm NATO-i teyari agütsüba teloki Gaddafi atsüngtoka küm 10 shi linük nung mepetmesü aser azü azütokshi tulu atalokba dak ajemdaker Saif al-Islam al-Gaddafi-i inyaksangshitsü imlar, ajisüaka ken o asadangertemi ashiba agi, election akoktsü imlar nung rongnung pa züngoksema mali.

Gaddafi-i yimsüsüba mapang ya Libya nung aikati kanga dang timtem aser teushi mapang ka ama bilemteter aser kasa mapang nung Saif al-Islam aser tanga taoba yimsüsürtem joko mapang talangka yimsüsüba nung shilem agia mali, anungji parnoki nütsüng nüburtem nem parnok pusemdaktsüsü atema anidentsü temela masütsü.

Pochury Gazetted Officer's Forum Silver Jubilee mungogo



Kohima, Yimpoksüi/November 14, 2021 (TYO): Honibarnü (13.11.2021) Meluri Village Council Hall nung Pochury Gazetted Officer's Forum (PGOF) pur silver jubilee benjungmung mungogo. Iba sentong nung Nagaland planning & coordination, land revenue and parliamentary affairs Minister, Neiba Kronu alakteta tejaoker ama aruagi aden aser "Aspire to inspire" omen nung ajemdaker iba sentong agia liasü, ta sangdong ajanga metetdaksü.

1996 küm Pochury Gazetted Officer's Forum (PGOF) ya officer 20 agi tentet aser tang PGOF nung züngsem 138 shi kumogo.

Iba sentong nung jembiba mapang, Kronu-i, küm 25 tashi takok ngua aruba atema PGOF nem tenüngsang agütsü.

Nübur den tesendaktep tajung ayutsü asoshi Kronu-i officer tem ajungshio go aser officer aika/ timba akümba kisung masü, saka pei maparen ochishia aser nendaka inyakba dak tuluka keta lir aser item jakla aser sempet ali nung dang lokti nung temelenshi adokdaksütsü akok, ta pai ashi.

Pai ashiba agi, tentet tajung ka ama PGOF-i local level nung inyakba tongtibang maparentem mittsüla aser lokti nung temelenshi adokdaksütsü aser terenlok lidaksütsü asoshi tasa

tajung agütsütsüla.

Lenla ajunga nung terenlok alitsü atema sorkar den longjemer inyaksü asoshi pai PGOF aser lokti lennirtem ayongzük.

Sorkar indang sentong aser mapatong balala nung shilem agitsü asoshi PGOF ayongzükba mapang, Minister Kronu-i iba tentet (PGOF) dang 'human resource' maparen nung temulung agütsütsü aser Pochury kin nem Tsüngremi moatsüba ali, arem aser ayong tem tajungba achaayangtsü atema ajaki meranga inyaksü ajungshia liasü.

Tetoktepba lima ka nung tangar den jangyumedema aotsüsa lanurtem atema sentong tajungtem sadema lapoktsütsü asoshi nyak tenzüksüla, ta pai tentet ajungshio go.

Kasa sentong nung, MLA Yitachu jaoka liasü aser officer temi shilem tulu agiba atema pai pelaba metetdaksü.

Alimai Pochury kin jangjatetsüsa inyakba aser tenüng tajung bener aruba atema, pai PGOF züngsem nem tenüngsang agütsü.

Yitachu-isa, Pochury kin tejakleni aotsü aser terenlok lidaksütsüsa lokti atema meranga inyaksü asoshi Pochury officer tem ayongzük.

Iba sentong tenzüka, Pochury Baptist Church Council, executive secretary, Rev.

Riimatho Nyusou-i sarasadem. Planning Committee, Convenor, Er. Chirhotho Rasutho menden liasü aser PGOF, president, M. Rhovisie Nyuwi ajanga tir o jembi.

Planning committee, züngsem Er. Fineson Pojar-i, tongtibang nisungtem aser iba silver jubilee takok ngua amungtsü asoshi sentong achaayanger ajak nem tenüngsang agüja liasü. Pochury Hoho president Jonpa Jurry-ia iba sentong nung jembiogo.

Kasa sentong nung, Miitsa Kajiri aser Rhuthsomu Pfithu nati ken aten. Ano, Meluri Village Women Society ajanga sobaliba ken ka tena liasü.

Ar. Wachusie Katiry-i, general secretary report agütsü aser Vice president, PGOF, Ar. Tarachu Pfithu-i tepela anküp o jembi.

Maneni, PGOF tenteter küm 25 ajungba nungtem nung, Hokolbarnü (12.11.2021) men's doubles badminton asayamung ayongzükba liasü. Iba badminton asayamung nung nisung 22 agi shilem agiogo.

Iba asayamung nung, Rhovisie Nyuwi aser Tsewatho Nyuwi nati takok angu. Kasa mapang, Chirhotho Rasutho aser Thoshusie Katiry nati runner-up jenjang ajangzük tet.

Shelly & Chupitho aser Thsiivisie & Poriitho nungeri semi final tongtetta asayaogo, ta kasa sangdong nung shia lir.

UNGMA YIMLANG KUSASANGER PUSU MENDEN-IPELABA LEMSATEPER

10 November 2021 anogo Ungma Senso tajung DR S.C. JAMIR India sorkari pa dak alang Padma Bushan Award agütsür New Delhi nungi meyipa aruba mapang Dimapur Ao Senso Telongjem-i anir, Ao Kaketshir Telongjem Dimapur, Aor Lanur Telongjem Dimapur, Watsü Telongjem Dimapur, Chumukedima Ao Senso Telongjem, Naga Council Dimapur, Central Naga Tribes Council, ano temulonger lokti tentet aser shirnokisa India nungeria hau ta sütettsüsa kanga meraketa tushia agizükogo, ozü pusu menden-i nenok ajak dang kanga pelara ta ayimoktsür.

Tsüngremi nenok ajak tali moajang ta aji ozü sarasadem.

Sd/-

- 1) Temsuzenba Longkumer AOLA
- 2) Omentiba Jamir TATAR
- 3) Imli Imsong TATAR

OFFICE OF THE REONGSANGER PUTU MENDEN KANGTSÜNG

B.P.O. Kangtsüng, P.O. Tuli
Mokokchung : Nagaland - 798618

TENÜNGSANG TULU AGÜTSÜR

Senso tajung shirnokisa pei inyakba sorkar wadang balala nung ajemalua meranga nendaka inyakba alang temaba jenjangi ajungketogo Reongsanger Putu Menden Kangtsüng ajanga Tsüngrem tenüng sanga kümrem pelaba den külemi takok angurtem ajak nem tenüngsang tulu agütsür. Tarutsü anogotem nunga sorkar-i sakloka aser sensosanger asoshi nükdang tajung kaka asütsü temoatsü apokja sarasademtsür.

1. **Wb. I. Chuba Lemtur**, Department of Treasuries and Accounts, Govt. of Nagaland nung Assistant Director nungi Deputy Director jenjangi ajungket.
2. **Wb. Lanuchuba**, Department of Treasuries and Accounts, Govt. of Nagaland nung DAO nungi Assistant Director jenjangi ajungket.
3. **Wb. R. Atuba Jamir**, Nagaland State Transport Department nung Station Superintendent nungi AGM jenjangi ajungket.
4. **Wt. Imlinaro**, Department of Treasuries and Accounts Govt. of Nagaland nung Sr. DA nungi DAO jenjangi ajungket.

Sd/-
Takameren
Chairman

Sd/-
Secretary
Noklennükshi

'Section Eight' nung Mickey Rourke-i shilem agitsü

Yimpoksüi/November 14, 2021 (Agencies): Taruba action movie 'Section Eight' nung Dolph Lundgren den külemi shilem agitsü asoshi cast rongnung Mickey Rourke aniokogo.

Iba project atema taoba mapang, Lundgren, Scott Adkins, Ryan Kwanten, Dermot Mulroney aser Justin Furstenfeld nung sangdonga liasü aser tang tesüsa cast rongnung arishi küm 69 tain star Mickey anioker asütsü.

Iba movie ya taoba mapang sepa ka taküm otsü asütsü, kong nisung tamajungeri pa kinungtsü aser chirnurtem tepsetba atema pai item nisung dak mang ayangba sülen, tepuokdak nungi pa jena adoker aser meimbanga tentetba sorkar tentet ka ajanga pa mapa nung anioker.

Chad Law aser Josh Ridgway nati züluba screenplay nung ajemdaker Christian Sesma-i iba film direct asütsü. Iba movie ya Firebrand indang Brandon Burrows-i produce asütsü.

Brandon-i ashiba agi, "Section Eight nung Mickey anisemba ajanga otsü tali mera ketdaksür."

Mickey Rourke-i 'The



Mickey Rourke

Wrestler', 'Iron Man 2' aser 'Sin City' densema nüngtugu film balala nung shilem agiogo. The Wrestler atema Best Actor category nung pai nomination angu.

Mickey-isa 'Warhunt' nung shilem agiogo. Iba film ya World War II indang otsü asütsü. Taiba küm Covid-19 tenokdangba ajanga iba project maparen thinena liasü, saka Latvia nung production maparen tenzüksüsa liasü.

Taoba mapang boxer Mickey-i, "Iba project atema Riga tonga ao aser COVID-19 ajanga maparen nung tetsükdaksü jenti adokdaksü, saka iba project takok ngua renemogo," ta ashi.

Tuensang nung essay competition nung takok angurtem tushio go

Tuensang, Yimpoksüi/November 14, 2021 (TYO): district level essay competition agia liasü.

Azadi Ka Amrit Mahotsav Iba tetoktepba nung takok shilem ama, Brehostibarnü angurtem - GHSS Thangjam DC's Office Chamber nung indang Chemi Shiu aser GHSS "Relevance of Gandhiji's Tuensang indang Simi Kumari thoughts for building a peaceful nem Deputy Commissioner and prosperous Nagaland" Tuensang, Kumar Ramnikant-i omen nung ajemdaker certificate agüja liasü, ta Governor's certificate of sangdong ka ajanga excellence certificate atema metetdaksü.

Nov. 26 nü Amazon Prime Video nung 'Chhorii' sayatsü

Mumbai, Yimpoksüi/November 14, 2021 (Agencies): Bollywood actress Nushratt Bharuccha-i tongti shilem agiba horror movie - "Chhorii" ya November 26 nü Amazon Prime Video nung sayatsü terenemba lir, ta Mongolbarnü, Amazon Prime sangdong ka ajanga metetdaksü.

Vishal Furia-i direct asüba film ya Sakshi (Bharuccha)-i ajangshiba otsü ka asütsü, kong lai yimtsüng tezü ka nung temenen agi temoktemnüba ajangshir. T-Series, Crypt TV, aser Abundantia Entertainment nungeri produce asüba "Chhorri" film ya Furia indang 2017 küm sayaba nüngtugu Marathi film "Lapachhapi" nung ajemdaker yangluba otsü ka asütsü.

"Tetsübuttsü aketba otsü #Chhorii, November 26 nü Prime nung sayatsü," ta Twitter nung Amazon Prime ajanga film indang poster ka iba olen lemsatep.

Iba film nung, Mita Vashisht, Rajesh Jais, Saurabh Goyal aser Yaanea Bharadwaj nungeri shilem agiba angutsü.

Mongolbarnü, Nushratt Bharuccha-ia Instagram nung iba film sayatsü osang lemsatepa liasü. "Chhorii" film ya Bhushan Kumar, Krishnan Kumar, Vikram Malhotra, Jack Davis aser Shikhaa Sharma nungeri yangluogo.



NSFA-i state level Dead Lift tetoktepba ayongzük



November 13 nü Ciekhan Fitness Gym, Kohima nung senpet agütsüba sentong tembangba sülen takok angurtem aser tetoktepba ayongertem tangokba noksa nung angur.

Kohima, Yimpoksüi/ November 14 (TYO): Nagaland Strongman & Fitness Association (NSFA)-i ayongzükka state level first class Dead Lift tetoktepba ka November 13 nü Ciekhan Fitness Gym, Kohima nung asayaogo.

NSFA General Secretary, Vechita Khesoh-i sangdong ka ajanga ashiba agi, Nagaland kübok Gym balala nungi tetokteper 38-i iba tetoktepba nung shilem agiogo.

Kayina Gym nungi Zhokventi Tsongs-i under 60 Kg category nung tetoktepba akok aser Zumu Gym nungi Dapa Domeh runner up liasü.

Under 70 Kg category nung tetoktepba Zumu Gym Kohima nungi Zhopao Movi-i akok. Pai 190 Kgs ajungketteta liasü. Iba category nung Vecibu Rhakho runner up liasü.

Glex Appeal Gym, Kohima nungi National Gold medalist aser defending Cross Fit Champion, Nagaland Vizobeilie Punyu-i 240 Kgs ajungketteta under 80 Kg category nung tetoktepba akok aser Universal Gym, Dimapur nungi Mukhesh Kumar Das runner up liasü. Pai 200 Kgs ajungket.

90 Kg category nung Ciekhan Fitness Gym, Kohima nungi Kekhriesetuo Mechulho-i 240 Kgs ajungketa tetoktepba akok aser The Home Gym, Dimapur nungi Pelesetso Khate-i 220 Kgs ajungketa pa tanabuba jenjang nung liasü.

Chisel Gym, Kohima nungi reigning Nagaland Wrestling Association Champion Venuzo Dawhuo-i, 100 Kg category nung 245 Kgs ajungketa tetoktepba akok.

Under 100+ Kg category nung Flex Appeal Gym,

Kohima nungi Tsuknungakum Jamir-i 250 Kgs ajungketa Champion title angu aser kasa mapang nung Amplified Gym, Kohima nungi arishi küm 16 tain Kevidi Linyu-i 225 Kgs ajungketa runner up liasü.

Kasa mapang nung Zumu Gym, Kohima nungi Zhopao Movi nem iba tetoktepba nung Best Lifter title agüja liasü.

Jenjang balala nung takoker ajak nem senpet den kuli kaket agütsüogo. Iba tetoktepba ya Mez & Co aser PHED-i teyari agüja ayongzükka mungogo.

Maneni tetoktepba ayongertemi shilem agirtem, tetoktepba ketdangsürtem manager tem aser coach tem ajak dang iba tetoktepba takok asoshi teyari tulu agütsüba atema kanga pelaba lemsatepogo. Tetoktepba ayongertemisa sentong sponsorer tem dang kanga pelaba lemsatepa liasü.

France aser Belgium na World Cup atema qualify süogo

Paris, Yimpoksüi/ November 14 (Agencies): Honibarnü Parc des Princes nung Kazakhstan goal 8-0 agi akokba sülen World champions France pur Qatar nung World Cup atema qualify süogo. Iba asaya nung Kylian Mbappe-i goal 4 idakja liasü.

Asaya nung Karim Benzema-ia goal ana idaktsü aser tanungba goal tem ya Adrien Rabiot aser Antoine Griezmann nati idakja liasü. Griezmann-i penalty ka ajanga goal ka idaktsüba ya France nungi asayaba mapang pa asoshi goal 42buba liasü aser pai Michel Platini ajatetogo.

Thierry Henry (51) aser Olivier Giroud (46) nati dang France atema goal timba idaktsür lir.

Kasa mapang nung Belgium-ia goal 3-1 agi Estonia koka World Cup atema qualify süogo. Group E nung parnok Gareth Bale-i aniba Wales team dang nungi temaba jenjang nung tembangogo. Wales-i Cardiff nung goal 5-1 agi Belarus koka liasü.

Netherlands, shirnok 2018 World Cup atema qualify mesütet, parnok takumbo qualify asütsü asoshi lenmang shidak nung aore ama liasü, kechiyong Montenegro den asaya nung goal 2-0 agi parnok tejakdang liasü.

Ajisüaka asaya atemtsü minute 10 dang anunga lia goal ana achiba sülen asaya goal 2-2 nung tembang. Group G nung parnok temaba jenjang nung lir, ajisüaka parnok Turkey aser Norway dang

nungi point ana agi dang timba lir.

Group D nung France temaba jenjang nung lir aser Finland aser Ukraine na tanabuba jenjang atema toktepar.

Final round masaya tsünga Bosnia-Herzegovina goal 3-1 agi akokba sülen Finland point ana agi timba lir.

Kasa mapang nung Belgium-i tang tashi nung point ka dang menguteti lir aser Estonia kokra Group E nung parnok temaba jenjang nung tembangtsü ta jangjar liasü.

Denmark aser Germany na qualify asüba sülen tang France aser Belgium nata qualify süogo aser automatic qualify asütsü atem team trok ya asaya tatembangbuba nungang jangjatsü.

2024 T20 World Cup USA nung asayatsü akok

Sydney, Yimpoksüi/ November 14 (Agencies): 2024 T20 World Cup USA nung ayongzükka asayatsü akok, aser iba ajanga ICC-i 2028 Los Angeles Olympics nungi tenzükka cricket asaya benoktsü atema inyaktepa aliba tamendakdak ka akümtsü.

USA Cricket aser Cricket West Indies nati 2024 T20 WC ayongtsü atema benoker aliba ICC-i temelaba agütsütsü imlar.

Sentongtem yanglur aliba ama ataloka ora 2014 küm Bangladesh nung T20 World Cup ayongzükka asayaba sülen tang mezüngbuba India, England mesera Australia nung masü saka tanga linük ka nung iba asayamung ayongzükka asayatsü.

ICC-i linük balala nem iba asayamung ayongzükka asayadaktsütsü atema mapa talangka meranga arudar.

2021 aser 2022 WC, kong team 16 tsünga asaya 45 asyaa liasü, iba den medemdangra 2024 T20 World Cup nung team 20 aser asaya 55 asayatsü imlar.

2024 aser 2031 kümtem tsünga global asayamung balala ayongzükka asayatsü atema ICC renema lir, koba 2024 T20 World Cup nungi tenzüktsü.

"Küm tem tsünga

inyaksangshi nung temelenshi ka bener aruba dang masü saka 2024 küm asayamung ayongzükka asayatsü atema US shimba ajanga Olympic Games nung cricket asaya bendenloktsü atema mapang talangka inyaktepa aruba tamendakdak ka akümtsü, koba LA nung tenzüktsü aser iba sülen 2032 küm Brisbane ta alitsü," ta Australian daily sangdong ajangsa metetdaksü.

India Test specialists tem atema camp ayonger; Mitchell-i Conway melenogo



Daryl Mitchell

Mumbai, Yimpoksüi/ November 14 (Agencies): November 17 nü nungi tenzükka India aser New Zealand na T20I asayaba mapang India nunger Test specialists tem Mumbai Cricket Association indang ground; Bandra-Kurla Complex (BKC) nung Hombarnü nungi tenzükka anogo pezü camp ka akatsü.

Virat Kohli anisüngzükba mapang Kanpur nung mezüngbuba Test Ajinkya Rahane lenisüba nung asayatsü aser pabo BKC nung joko anogo asembuba training agidar, ta source balalai metetdaksüogo.

Rahane dak alia iba camp nung openers Mayank Agarwal aser Shubman Gill, middle-order batters Cheteshwar Pujara, wicketkeepers Wriddhiman Saha aser KS Bharat, off-spinner Jayant Yadav aser pacers Ishant Sharma, Umesh Yadav aser Prasad Krishna nungeri shilem agitsü.

Ajinkya Rahane lenisüba nung New Zealand den

mezüngbuba Test asayatsü aser Virat Kohli tanabuba Test nung adentsü. Iba Test asayamung atema Rohit Sharma nem anisüngzük agütsüogo.

Mezüngbuba Test Kanpur nung November 25 nü nungi asayatsü.

Kasa mapang nung New Zealand team nungi Devon Conway yiruba sülen pa

melena India den Test asaya ana atema Daryl Mitchell shimogo, ta New Zealand Cricket-i Deobarnü metetdaksü.

Bodhbarnü England akokba asaya nung Conway teka yirua liasü.

"World Test Championship cycle tasenba nung mezüngbuba asayamung nung Devon masayatetsüsa akümba ya tesasatsüka, saka iba ajanga tangar ka nem maongka agütsütsü," ta coach Gary Stead-i ashi.

"Daryl ya versatile asayar ka anungji pai mashi position ka nung asayatetsü aser pa dang kanga temulung lema asayaba mapang ka lir," ta paisa ashi.

BILEMDANGANG

"Tamendakdak mejungra takok mangutsü."